



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke

Anr.329/2021

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Faton Ademi kryesues, Milena Đerić dhe Zyhdi Haziri, anëtarë, me pjesëmarrjen e zyrtarit ligjor Faton Xhaqkaj, duke vendosur përkitazi me ankesën e BIRN dhe Internews Kosova, me seli në Prishtinë, paraqitur kundër subjektit politik Aleanca për Ardhmërinë e Kosovës (AAK), me seli në Prishtinë, për shkak të vendosjes së materialit zgjedhor - posterit në rrugë publike, për Zgjedhjet e Parakohshme për Kuvendin e Republikës së Kosovës, që do të mbahen me datë 14.02.2021, në seancën e panelit të mbajtur me 08.02.2021, mori këtë:

V E N D I M

I. PRANOHET e bazuar ankesa A.nr.329/2021 e datës 04.02.2021 e ushtruar nga organizata BIRN dhe Internews Kosova, me seli në Prishtinë, ndërsa subjektit politik Aleanca për Ardhmërinë e Kosovës (AAK), me seli në Prishtinë, për shkak të shkeljes së Kodit të Mirësjelljes për subjektet politike - vendosja e posterit për fushatën zgjedhore mbi rrugë publike, në afërsi të shkollës “Mihail Grameno” në Komunën Fushë Kosovës, i shqiptohet gjobë në lartësi prej 1,200.00 (njëmijë e dyqind) euro.

II. DETYROHET Subjekti Politik Aleanca për Ardhmërinë e Kosovës (AAK), me seli në Prishtinë, që gjobën e shqiptuar si në pikën -I-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi, nën kërcënim e shqiptimit të dënimit shtesë.

A r s y e t i m

Organizata BIRN dhe Internews Kosova me seli në Prishtinë, ka parashtruar ankesë A.nr.329/2019 me datë 04.02.2021, me të cilën pretendon se në rrugën publike përkatësisht në Fushë Kosovë, në të dy anët e mbikalimit, në afërsi të shkollës “Mihail Grameno”, kanë hasur në poster të kandidatit për deputet të subjektit politik AAK. Me këtë rast nga ana e këtij subjekti është bërë shkelja e nenit 33 paragrafi 1 pika b) i LZP-së. Parashtruesi i ankesës si provë ka bashkangjitur disa fotografi të printuara lidhur me rastin në fjalë.

Në përgjigje në ankesë të datës 05.02.2021, subjekti politik AAK, thekson se ky subjekt ka larguar posterin e kandidatit për deputet brenda pak orësh me të pranuar ankesën, kështu që subjekti dhe kandidati në fjalë kanë marrë të gjitha veprimet e nevojshme përmirësuese dhe i propozojnë PZAP-it që ankesën e BIRN ta refuzon në tërësi si të pabazuar. Përgjigjes në ankesë i ka bashkangjitur edhe një fotografi si dëshmi për largimin e posterit.

Paneli, pasi që shqyrtoj të gjitha shkresat e lëndës në kuptim të nenit 117 par. 2 të LZP-së, gjeti se:

Ankesa është e bazuar

Nga shkresat e lëndës vërtetohet se Organizata BIRN dhe Internews Kosova me seli në Prishtinë, ka parashtruar ankesë A.nr.329/2019 me datë 04.02.2021, me të cilën pretendon se në rrugën publike përkatësisht në Fushë Kosovë, në të dy anët e mbikalimit, në afërsi të shkollës “Mihail Grameno”, kanë hasur në poster të kandidatit për deputet të subjektit politik AAK. Pas pranimit të ankesës në PZAP, e njëjta i është dërguar subjektit politik AAK për përgjigje në ankesë.

Subjekti politik AAK me datë 05.02.2021, ka paraqitur përgjigje në ankesë, duke i kundërshtuar në tersi pretendimet e ankuesit të parashtruara në ankesë dhe duke kërkuar që ankesa të refuzohet e pa bazuar.

Paneli pas shqyrtimit të shkresave, e posaçërisht nga fotot e ofruara si provë nga parashtruesi i ankesës, të cilat gjenden në shkresat e lëndës, në mënyrë të padyshimtë, ka konstatuar se materialet zgjedhore - posterit i kandidatit për deputet nga subjekti politik AAK, është vendosur në hapësirat publike-rrugë, përkatësisht mbikalim, veprim ky që është në kundërshtim me nenin 33 pika b) e LZP-së, e cila përcakton “Vendosja e njoftimeve, pllakateve dhe postereve, ose përndryshe, vendosja e emrave të tyre ose e sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugë publike, në shenjat publike të trafikut, brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombëtare, ose brenda ose në hapësirat private pa lejen e pronarëve ose shfrytëzuesve”.

Paneli, vendimin e tij e ka mbështet në dëshmi të qarta dhe bindëse siç përcaktohet me nenin 117 par. 3 të LZP-së, prandaj pretendimet në përgjigje në ankesë nuk u cilësuan me ndikim në meritat e lëndës.

Parashtrimet në përgjigje në ankesë, se veprimet e subjektit politik AAK, nuk mund të sanksionohen si shkelje të LZP-së, për arsye se vendosja e materialeve zgjedhore-posterave në shesh dhe shfrytëzimin e hapësirës të dedikuara për poster nuk përbën shkelje, Paneli pretendimet e tilla i vlerësoj si të pa bazuara dhe si të tilla i refuzoj pasi që, me këto prova nuk justifikon veprimet që janë të ndaluara dhe në kundërshtim me dispozitat ligjore të Nenit 33 pika b) i LZP-së, si dhe neni 5, paragrafi 1, pika d) e Rregullës 13/2013, ku parashihet se subjektet e certifikuar politike aktivitetet e tyre zgjedhore duhet t'i bëjnë në pajtueshmëri me Rregullat zgjedhore të Komisionit Qendror Zgjedhor (KQZ). Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalët, shkallën dhe peshën e shkeljes, pjesëmarrjen e subjekti politik në zgjedhjet e mëparshme që konsiston në faktin së subjekti politik AAK, ka qenë e njoftuar me obligimet dhe përgjegjësit gjatë procesit të fushatës, shkeljet e rregullave dhe Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me Rregullat zgjedhore si dhe shumën e fondeve që ka marrë subjekti politik prej Buxhetit të Republikës së Kosovës, për zhvillimin e aktiviteteteve

lidhur më fushatën zgjedhore. Paneli po ashtu me rastin e përcaktimit për lartësinë e gjobës ka marrë parasysh edhe përgjigjen në ankesë të subjektit politik AAK, ku me një fotografi të printuar dëshmohet se posteri është larguar dhe kjo vlerësohet ndërmarrje e masave përmirësuese, e cila pastaj ka rezultuar në uljen e lartësisë së gjobës së shqiptuar si në dispozitiv të këtij vendimi.

Përveç të cekurave më lartë Paneli, me rastin e vendosjes i vlerësoi edhe të gjitha pretendimet e subjektit politik Aleanca për Ardhmërinë e Kosovës, në kuadër të pretendimeve të theksuara në përgjigje në ankesë, mirëpo të njëjtët ishin jo relevante dhe pa ndikim për një vendimmarrje ndryshe nga ajo që është vendos.

Nëse subjekti të cilit i është shqiptuar dënimi nuk e paguan të njëjtin brenda afatit të përcaktuar në dispozitiv të tij, atëherë në pajtim me nenin 120.2 të LZP-së, subjektit do ti shqiptohet dënim shtesë. Ky paralajmërim për dënim shtesë është përcaktuar me nenin 120.2 të LZP, i cili përcakton: “ 120.2 Dështimi për të paguar dënimin apo për t’ju bindur një urdhërese të PZAP-it brenda periudhës kohore të saktësuar në vendimin e PZAP-it, është një shkelje tjetër e këtij ligji që mund të sanksionohet me dënim shtesë nga PZAP-i. ”, ashtu siç është vendosur në pikën II të dispozitivit të këtij vendimi.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtrasa
Anr. 329/2021 më datën 08.02.2021

Kryesuesi i Panelit
Faton Ademi



Këshilla Juridike: Kundër këtij vendimi nuk është e lejuar ankesa sipas nenit 118 par. 4 të LZP-së,